

Script of Morning Gojri News Bulletin 02 March 2025 at 1015Hrs

مارننگ گو جری نیوز بلیٹن مورخہ 02 مارچ 2025

یوہ آکا شوانی جموں ہے باغ علی طاہر تیں خبر سُنو۔

Budget Session

جموں کشمیر قانون ساز اسمبلی غو بجٹ اجلاس پہلک یعنی 3 مارچ تیں شروع ہو رہیو ہے۔ لیفٹنٹ گورنر منوج سنہا قانون ساز اسمبلی کمپلیکس جموں مانہ سویر 10 بجے اسمبلی سنگ خطاب کریں گا۔ اس سلسلہ مانہ تمام انتظامات مکمل کر لیا گیا ایں، جن مانہ حفاظتی بندوبست تے ممبران اسمبلی غا بیٹھن غا انتظامات شامل ہیں۔ اجلاس غے دوران خصوصی طور ور بجٹ تے انتظامی معاملان نانہ ترجیح دتی جائے گی۔ اس توں علاوہ یوٹی غی اقتصادی ترجیحات ور وی خصوصی توجہ دتا جان غی امید ہے۔

Party Meeting

پلک یعنی سوار آلے روز تیں بجٹ اجلاس شروع ہون تیں پہلاں حزب اقتدار غی جماعت نیشنل کانفرنس نے اج قانون ساز پارٹی غی اک اہم میٹنگ طلب کی ہے۔ پارٹی غا چیف وپ مبارک گل نے جانکاری دیتاں واں دسیو ہے جے یاہ میٹنگ پیشی 2 بجے جموں مانہ وزیر اعلیٰ عمر عبداللہ غی رہائش گاہ ور منعقد کی جائے گی، جس مانہ بجٹ سمیت اہم معاملات ور غور کیو جائے گو۔ اسے دوران کانگریس غی وی پارٹی گا صدر دفتر جموں مانہ پیشی 2 بجے ہی اک میٹنگ منعقد ہو رہی ہے۔ اپنا اک خط مانہ پا رٹی غا چیف وپ تے بانڈی پورہ غا ایم ایل اے نظام الدین بھٹ نے پارٹی غا تمام ایم ایل ایز نانہ پارٹی صدر دفتر مانہ منعقد کی جان آلی میٹنگ مانہ شامل ہون غی دعوت دتی ہے۔

Ramzan Greeting

آج پورا مُلک مانہ ماہ رمضان شروع ہو گيو ہے۔ لیفٹنٹ گورنر منوج سنہا تے وزیر اعلیٰ عمر عبداللہ نے لوکان نانہ ماہ رمضان غی آمد ور مبارک دتی ہے۔ اپنا اک سماجی میڈیا پوسٹ مانہ لیفٹنٹ گورنر نے اُمید ظاہر کی ہے جے اس مہینہ غے دوران عبادت تے دُعاواں غے نال نال غریب تے دیا کُچلیا افراد غی حوصلہ افزائی غا کم وی کیا جائیں گا۔ وزیر اعلیٰ عمر عبداللہ نے اس موقع ور لوکان مانہ اتحاد، پیار تے آپسی احترام غی

ضرورت ور زور دتو۔ نالے لوکاں نانہہ اِس مہینہ غے دوران کی جان آلی دُعاواں مانہہ جموں کشمیر غی ترقی، اُمن تے بھائی چارہ مانہہ مضبوطی واسطے دُعا کرن واسطے وی کہیو۔ اِسے دوران نائب وزیر اعلیٰ سُریندر کمار چودھری، وزیر سکینہ اِتو، جاوید احمد رانا تے جاوید احمد ڈار نے وی لوکاں نانہہ اِس ماہ رمضان غی مبارک دتی ہے۔

Rana Camp Poonch

جل شکتی محکمہ غا وزیر جاوید احمد رانا نے لوکاں توڑی رسانی حاصل کرن تے اُن غی مشکلات غو پتو لان غی خاطر کيجان آلی کوششاں غے تحت کل بالا کوٹ غا مقام ور اک عوامی کیمپ لایو، جت اُن سنگ کئی وفود نے ملاقات کر غے اپنا مسائل تے مشکلات اُن غے باندے رکھیا، جن مانہہ تعلیمی ڈھانچہ، صحت سہولت، سڑکاں غی تعمیر تے قبائلی بہبود جیسا مسائل شامل ایں۔ اِس موقع ور جناب رانا نے لوکاں نانہہ بڑی توجہ سنگ سنیو، تے افسران نانہہ موقع ور ہی اِن مسائل غا ازالہ کیا جان غی ہدایت کی۔ اُنہاں نے نے اِس موقع ور مقامی انتظامیہ تے سیاحت نانہہ فروغ دین غی خاطر نمایاں سرمایہ کاری غو وی اعلان کیو۔ اُنہاں نے لوکاں غی زندگیاں مانہہ آسانی پیدہ کرن تے جامع ترقی غا سرکار غا وعدہ نانہہ وی دُہرایو۔

CS SBM

چیف سیکریٹری آئل ڈُلُو نے گرانیں ترقی محکمہ غی اِک میٹنگ غی صدارت کرتاں واں محکمہ غا عمل آوری بارے منصوبہ غی پیش رفت غو جائزو لیو۔ جناب ڈُلُو نے محکمہ ور زور پایو جے سوچہ بھارت مشن گرامین غے تحت کیا جان آلا کماں غو مکمل تجزیو رکھیو جائے، تانجے اِس مشن غے تحت طے کیا گیا مقاصد مانہہ پایا جان آلا خلیج غو پتو لایو جاسکے۔ اُن غو کہنو تھو جے ایسا خلیج غو پتو چلن غے بعد تاؤلاں توں تاؤلاں بند کیو جا نو چاہیے، تانجے مشن غا مقصد نانہہ حاصل کیو جا سکے۔ چیف سیکریٹری نے کہیو جے مہارا گراں صحیح معنی مانہہ صاف ستھرا نظر آنا چاہیں، کیونجے سوچہ بھارت مشن غی طرفوں کوڑا کرکٹ وغیرہ نانہہ ٹھکانے لان واسطے خاطر خواہ وسائل غی پیشکش کی گئی ہے، تانجے زمینی سطح ور بہتر نتیجہ حاصل کیا جا سکیں۔

Announcement

علاقائی خبراں غا شعبہ آکاشوائی جموں غی طرفوں ضلع کٹھوعہ واسطے عارضی نامہ نگار یعنی پی ٹی سی غا پینل غی خاطر درخواست منگی گئی ہیں۔ مجوزہ پرفارمہ ور عارضی نامہ

نگار غی پوسٹ مانہ دلچسپی رکھن آلا ایسا امیدوار درخواست دے سکیں گا جہیڑا ضلع کٹھوعہ غابسنیک وین تے اُن غی عمر غی حد 24 براں تیں 50 براں غے بشکار وے۔ پی ٹی سی غی اس پوسٹ واسطے تعلیمی قابلیت پی جی ڈپلومہ یا صحافت غا شعبہ مانہ ڈگری یافر تسلیم شدہ یونیورسٹی تیں گریجویشن غے ہمراہ 2 بہراں غو صحافت مانہ تجربو مقرر کیو گیو ہے۔

اس تیں علاوہ کمپیوٹر تے ورڈ پروسیسنگ نالے خبر اکٹھی کرن آلا آلات تے میڈیا کوریج مانہ تجربو وی ضروری ہے۔ عارضی نامہ نگار غی پوسٹ مانہ دلچسپی رکھن آلا امیدوار واسطے لازمی ہے جے وہ ضلع صدر دفتر کٹھوعہ مانہ یا اس تیں 10 کلو میٹر غادائرہ اندر رہائش پزیر وے اس سلسلہ مانہ درخواست غی ہارڈ کاپی ضروری دستاویزات غے ہمراہ ہیڈ ریجنل نیوز یونٹ آکاشوانی پنجترتھی جموں مانہ بزات خود آئندہ 7 مارچ توڑی دینی ویگی۔ اس بارے مزید جانکاری ویب سائٹ

www.newsonair.gov.in

ور دستیاب ہے۔

Highway

جموں سرینگر قومی شاہراہ ور گڈیاں غی آؤ جائی ہلارکا وٹ جاری ہے، البتہ بڑی گڈیاں نانہ چھڑی جموں تیں سرینگر در جان غی ہی آجوں اجازت دتی گئی ہے۔ مسافر گڈیاں نانہ اپنی سائڈ ور ہی چلن غی ہدایت کی گئی ہے، تانجے خواہ مخواہ غا جام تیں بچیو جا سکے۔ مسافراں نانہ یوہ وی کہیو گیو ہے جے وے قومی شاہراہ ور چھڑا دن غا وقت مانہ ہی چلن نانہ ترجیح دیں، تے رام بن اور بانہال غا مقام ور خواہ مخواہ گڈیاں نانہ نہ روکیں، کیونجے قومی شاہراہ غا اس حصہ ور زمینی تودا تے پتھر وغیرہ آن غو آندیشو بنیو رہ۔ البتہ ایس ایس جی روڈ، بھدرواہ چمبا سڑک، مغل روڈ تے سنتھن روڈ آجوں وی گڈیاں غی آؤ جائی واسطے بند این۔

اس غے نال ہی خبراں غو یوہ بلیٹن مُک گیو۔